

öffentlichen Prüfung

der Schüler unserer Gelehrtschule,

welche

Montag, den 10. April, Nachmittags 2 Uhr und
Dienstag, den 11., Morgens 9 Uhr
angestellt werden wird,

ladet

alle Gönner und Freunde der Schule
gehorsamst und ergebenst ein

Dr. J. A. G. Schütt,
Rector der Schule.

Vorher vom Herrn Collaborator C. H. A. Wolff:

De praepositione ex nomine apta apud Plautum
et Terentium.

Quisum, 1848.

Gedruckt in Meyler's Königl. privil. Buchdruckerei.

11/11/11

11/11/11

11/11/11

11/11/11

11/11/11

Latini sermonis usum et exercitationem ad eloquentiam et ad scribendi elegantiam maiores nostri magis quidem, quam nostra aetas, tenuisse videntur: sed successit nunc acrior quaedam petita e philosophia intelligentia atque consummatior ex omni parte artis ratio. Nam nunc fere vituperantur quicumque grammaticae complexum non via et ratione philosophia duce condit, sed vasta illa copia observationis atque usus congerenda defungi se opera existimat. Ea autem artificiosior ratio parta demum est, ex quo multorum studia atque ingenia singulas aliquas sibi partes sumpserunt diligentius declarandas. Non potest enim nisi singularum partium ratione et causis penitus perspectis et descriptis totius formae quasi figura et species effici. Multa sunt omnium, quae ubique sunt, gentium linguis communia, multa propria latini sermonis. Multa quoque, quae in ipsis linguis vel gliscens aetas sensim invexit, vel alicuius sive audacia sive auctoritas novavit; id quod semper factitatum est vel a poetis, vel philosophis, vel his nostris temporibus ab iis, qui in republica gerenda versantur, civilibus hominibus. Neque id ignotum cuilibet,

qui latinarum literarum aetates ac tempora consideret. Multi denique iudicii multaeque intelligentiae est videre, quae quisque auctor habeat suae, de hisque cognoscere, utrum sint pulchra atque imitanda, an secus; hoc est, omnem omnium dictionem exigere ad Ciceronianam elegantiam ac sanitatem. Infinita plane res est, neque quae absolvatur vel omnium, qui in ea scientia elaborant, certamine et contentione: ut bene nobiscum agi videatur, quod etiam citra illam nobiliorem et antiquam, quam tenebant maiores, rhetoricam facultatem, non defutura sit nobis, qui nunc grammaticam passim profite-mur, opellae materies et acuminis pretium. Scilicet docendi sunt pueri in eum finem, ut lectione optimi cuiusque auctoris mentem alant et colant, animum oblectent et memoriam compleant magnarum rerum copia, sed stilum iam recidimus, neque latinitatis ipsam expressam poscimus formam. Haeremus circa praecipua artis et regulam, vastitate discendi laborantes, imitatio autem desperanda. Cotis instar exsortes sumus secandi. In latiores iam iaviamur et exspatiamur quasi campos coeli et terrae. Relinquenda avorum simplicitas et bonitas. Sed quo imprudens deferor? Quis ego sum, qui seculum accusare audeam? Neque hae meae partes, neque huius loci. Prologi persona agenda est, quum scholae nostrae gregem paramus in scenam producere. Properanda pagella, quae habeat argumenta ex orbe illo nostrarum scholasticarum literarum.

Dum mecum considero artis grammaticae incrementa et perfectionem, et quam multa multorum opera ac studiis indies

Sed me autē viginti fere annos impulerunt iudicia *), unius et alterius viri docti, obiter quidem de ea re mentionem facientis, ut operae pretium facturus esse mihi viderer, si in M. T. Ciceronis scriptis conquirerem et colligerem, quae nomina substantiva quas haberent ex se aptas praepositiones. Sed is libellus intra sodales scholae tum quidem premebatur. Neque enim ego tum poteram per actatē et parvum in literis profectum satis videre, quam late in grammatica arte ea res pateret, nec defuerunt insequentibus annis,

*) Jen. Lit. Zeit. 1825. Nr. 230. Rec. von Kraft's d. lat. Spr. — Riemer
Lex. s. v. *diu*.

qui idem eruditius multo et maiore cum cura agerent. Loquor ut apud scientes: nam quotquot grammaticam tractamus, non fere negligimus docere de hoc aperto iam argumento. Satis observatum et apud omnes notum est, Caesarem multa habere eiusmodi, velut: iter ex Hispania; fugitivi ab saltu Pyrenaeo; odor, teter ex multitudine cadaverum; quibus deinceps incrementum fecisse apud M. T. Ciceronem arctam illam et adstrictam in philosophia aut in iure definiendi brevitatem, qualia sunt; aegritudo ex miseria alicuius; frequens de aliquo fama, cum laude; abalienatio est eius rei, quae mancipi est, aut traditio alteri nexu, aut in iure cessio; apud Livium iam sive ex exemplis, sive ex ipsius indole liberiores, factam esse eam consuetudinem; neminem tamen in ea re fuisse improbiorem Tacito. De hoc scriptore fuse et copiose disseruit Roth ad vit. Agric. Exc. XXV.

Verum ut iam nemo dubitet, quin non abhorreat ab usu optimi cuiusque auctoris illa substantivorum per praepositionem copulatio: sic nondum nactus sum qui finibus eum usum certis circumscribere sciret, rem necessariam, ne incauti nos, qui Germanica sumus origine, vernaculae linguae consuetudine abrepti longius ab emendata latinitate discederemus. Unus exstitit, cuius erat totam rem absolvere, aetates distinguendo et modum praescribendo, intra quem iusta contineretur latinitas. Nam data opera tractavit hoc argumentum Hae-

nischius,*) director scholae Ratisborianae. Sed ea scriptio, quia scholae programma est, minus vulgata ac lectitata est, titulo tenus plerisque nota, nisi quod a Teipelio**) indicata est addita censura. Is ita pronuntiavit: luculenter quidem illo scripto demonstratum esse, adversus plurimorum dubitationem aut ignorationem, quam non esset alienus ab optimis et probatissimis auctoribus latinitatis ille praepositionis usus e nomine, non e verbo aptae, praemissis eiusmodi locis, ubi substantiva more verborum casum alterius nominis substantivi afficiant, ut: obtemperatio scriptis legibus, verbis velitationis, hanc rem curatio. Prudenter monuisse scriptorem, quam multo minus futura fuisset efficax ad sensum latina lingua sublata illa, quam diximus, praepositionis ratione. Neque tamen ipsum quidem circumscripsisse suis ac legitimis finibus hunc usum. Id autem fieri non posse, nisi plene ac perfecte enucleata casuum ratione, triplici illa quidem vel spatii, vel temporis, vel causae. Tum quoque illam prius absolvendam esse quaestionem, quot modis pro adiectivo vel adverbio possit praedicatum fieri per casum substantivi, sive solum, sive adiecta praepositione. Sed ipsum sibi scriptorem fuisse impedimento, quominus firmis praeceptis rem conficeret, quippe qui ex aureae, ut loquimur, aetatis scriptoribus maxime exempla

*) 1835—1838. *Ueber die Verbindung der Nomina substantiva durch Präpositionen in der lateinischen Sprache.*

**) *Arch. Bibliothek v. Jahn u. Seebach, 24 Bd. 2 Hft.*

conquisisset. Nomen enim cum nomine per praepositionem, ita fere coniungi, ut dicatur, ubi quid sit, id quod videri tactuque continetur, ideoque eam rationem maximè propriam esse popularis sermonis, non philosophorum. Itaque in exemplis colligendis rectissime principium fieri a Comiciis latinis, quo manifestior feret translatio a sensibus*) ad mentem, quae eruditiorum hominum, est ac philosophorum. Sed commotam et incitamentum esse ab Haenischio quaestionem ex gravissimis artis grammaticae, et libellos eius dignissimos, esse lectu omnibus eius artis studiosis. Dietrich**) quoque sic arbitratus erat, praepositionem ponere sine verbo magis communis et quotidiani sermonis, quam cultioris fuisse et elegantioris.

Illud de Comiciis vehementer mihi placebat et recte iudicatum esse arbitrabar, nihil usu fuisse tritius in vulgari Romani popelli, sermone, quam passerem in tecto, aquam e fonte, columnas circum forum, eadem aut simili licentia, quae nostras iam, qui nunc vivimus, linguas pervagata est. Plauti et Terentii fabulas omnes, quae superant, diligentissime perlegi et collegi exempla illius dictionis, de qua haec est disputatio; ut saltem, quod mearum virium esset, plenior

*) Quae sensibus continentur, eiusmodi sunt, ut: annulus ex auro iter per Alpes; quae mente: laetitia ex dolore per ambas effigiem ingenii sui, concessio per purgationem.

**) Zeitschr. f. d. Alterth. Wissensch. 1837, 4. Heft.

redderem materiem et copiam, unde profecta notatio regulam deinde ac praecepta pareret acutiorum hominum studiis.

In praepositionum numero una est, quae nisi ex nomine nunquam fere nomini praemittatur, erga.*) Neque aliter haec a Comicis usurpatur, quam quomodo a Cicerone fieri videmus. Plaut. Capt. II, 1, 48. per mei ted erga bonitatem patris; nisi quod ibi praeter consuetudinem postponitur. Mil. Glor. III, 1, 42. nosces meam comitatem erga te amantem.

Dietrich, quem referunt inter principes fuisse demonstrandi huius usus, qui immerito pro germanismo habetur, quinque praecipue praepositiones esse arbitratur, quae non verbo pro adverbio, sed nomini pro adiectivo adiungantur: de, a, ex, cum et sine. Addere debebat, si quid ego video: in. Id quidem verissimum est et cuius vel medioeriter attendenti observatu facile, nihil frequentius esse apud Ciceronem, quam cum et sine adiectivorum modo nomini substantivo convincta, ut: optabiles mortes cum gloria Cic. Tusc I, 49. ignavus et sine animo miles Epp. ad Att. I, 18. Hoc iam Comicis frequens et usitatum. Plaut. Amph. I, 1, 266. SOS. Signi dic quid est? MERC. Cum quadrigis Sol exoriens. Asin. V, 2, 28. si forte accubantem tuum virum conspex-

*) Nunquam memini sic dictum, ut apud Plaut. Cist. I, 1, 101. utut erga me est meritis.

ris cum corona amplexum amicam. Aulul. Argum. 2. defossam multis cum opibus aulam invenit. Aulul. I, 1, 1. Circumspectatrix cum oculis emissiciis. Cure. I, 3, 35. tnn' etiam cum noctuinis oculis odium me vocas? II, 3, 33. aequalem cum aqua. Cas. prol. 34. latine Plantus cum latranti nomine. III, 2, 26. mecum postulatio. Cist. IV, 2, 43. cistellam cum crepundiis. Most. II, 2, 82. pax mihi est cum mortuis. Menaechn. V, 2, 15. credo cum viro litigium natum esse aliquod. V, 7, 53. ait se mihi allaturum cum argento marsupium. Mil. Glor. I, 1, 16. nempe illum dicis cum armis aureis. Pseud. I, 2, 25. te, cum securi, caudicali praeficio provinciae. Poen. IV, 2, 30. haud amice facis, qui cum onere offeras moram. V, 5, 19. quis hic homo est cum tunicis longis? Terent. Eun. II, 3, 54. parasitus cum ancilla. Plaut. Aulul. II, 2, 38. te civem sine mala omni malitia semper sum arbitratus. Trin. II, 4, 83. coena hac annona est sine sacris hereditas. Capt. IV, 1, 8. sine sacris hereditatem. Poen. V, 3, 27. clarus clamor sine modo. Capt. III, 1, 12. verba sine penu et pecunia.

Quae notata habeo de praepositione de, haec sunt. Plaut. Amph. II, 2, 169. iam illud non placet principium de osculo. Aulul. prol. 31. hic senex de proximo; itemque II, 1, 49.

II, 4, 11. Capt. prol. 30. audivit de summo loco summoque genere captum esse equitem Aleum. Poen. III, 1, 13. dives de summo loco. Rud. IV, 5, 7. et eam de genere summo adolescenti dabo. Most. III, 1, 40. spes est de argento. III, 2, 8. non bonus somnus est de prandio. Menaechm. prol. 37. postquam Syracusas de ea re nuntius redit. Merc. IV, 3, 34. de istae sum iudex captus. Pseud. II, 2, 53. nam istic symbolum est inter herum meum et tuum de muliere. Poen. III, 1, 46. ei paratae ut sint insidiae de auro et de servo meo. Terent. Andr. I, 3, 2. quantum intellexi modo senis sententiam de nuptiis. Heaut. III, 1, 15. nam mihi quidem quotidie augeseit magis de filio aegritudo. V, 2, 2. ut pater tam in brevi spatio omnem de me eiecerit animum patris.

Nec minus praepositio ab suam habet vim instar adiectivi, ut non requirat verbum. Plaut. Capt. II, 2, 29. honore summo atque a summis viris. Bacch. II, 2, 19. quod ab illo attigisset nuntius. Mil. Glor. II, 2, 5. quemque a milite hoc videritis hominem in nostris tegulis. IV, 1, 16. egone ut ad te ab libertina esse auderem internuntius? Pseud. II, 2, 22. resne tu, an non es, ab illo milite Macedonio, servus eius, qui etc. Pers. IV, 3, 21. ob istam rem tibi multa bona instant a me. Rud. III, 2, 23. atque ab lippitudine

siccitas ut sit tibi. Trucul. IV, 4, 23. a milite omnis tum mihi spes animum efflaverit. Terent. Andr. I, 1, 129. iniuria ab illo. Ill, 1, 3. ab Andria ancilla. Et cum nomine adiectivo Plaut. Curenl. I, 1, 41. tam a me pudica est, quasi soror mea sit. Poen. prol. 65. olim abditivus a patre.

Porro ex saepe legitur e nomine substantivo aptum. Plaut. Asin. I, 1, 38. istam meretricem e proximo Philenium. Casin. Grex. Haec Casina huius reperietur filia esse a proximo. Men. V, 2, 39. amat hanc meretricem ex proximo. Capt. II, 2, 97. qui magis sit servus ex sententia. Ill, 2, 10. Philocratem ex Alide. Bacch. IV, 4, 1. huic deest statum statui ex auro. Merc. I, 2, 28. resinam ex melle Aegyptiam vorato. Terent. Eun. IV, 4, 17 ex iure hesterno panem atrum vorent. Plaut. Merc. II, 1, 33. atque ego conspicor navem ex Rhodo. Pseud. I, 2, 59. meque ut praedicet lenone ex Ballione regem Jasonem. Poen. III, 1, 51. isque se ut assimilaret peregrinum esse aliunde ex alio oppido. Stich. II, 2, 19. donaue ex auro. Trucul. II, 6, 30. quid illi ex utero exitio est? Terent. Eun. I, 2, 85. ex Aethiopia ancillulam. Adicienda etiam illa videntur, in quibus nomen non substantivum est, sed adiectivum. Plaut. Amph. I, 2, 31. lacrumantem ex habitu concinnas tu tuam uxorem. I, 1, 173. lassus sum e navi. I, 2, 43. ex amore hic quam

saevus est. *Asin.* I, 2, 17. reddam ego te ex fera fame mansuetem. *Eodem iure*, et haud scio an etiam potiore praepositio inest. *Plaut. Amph.* III, 4, 4. qui minus liceat — quam servulo in comœdiis? *Asin.* I, 2, 16. in pannis inopia. *Aulul.* II, 6, 3. obsonumque in nuptias. *Capt.* V, 1, 41. reducem in libertatem feci. *Casin.* III, 5, 63. annulum in digito. *Epid.* V, 1, 34. anellum aureolum in digitum. *Most.* III, 1, 133. nisi ut in vicinum hunc proximum mendacium. *Menaechn.* V, 7, 41. si quid imperii est in te mihi. *Mil. Glor.* II, 6, 62. quia hanc attingere ausus mulierem hic in proximo. II, 6, 8. meamne hic in via hospitam? III, 1, 29. eam pudet me tibi in senecta obicere solitudinem. IV, 1, 16. senis huius uxor *Periplectomeni* in proximo. *Pseud.* IV, 7, 74. suarum in pugna virium victoria. *Pers.* III, 1, 15. meum, opinor, imperium in te, non in me tibi est. *Stich.* IV, 1, 72. eccum tibi lupum in sermone. *Trin.* III, 2, 83. quid tibi interpellatio aut in consilium huc accessio est? *Terent. Adelph.* IV, 2, 45. lectulos in sole ilignis pedibus faciundos dedit. IV, 4, 21. lupus in fabula. *Phorm.* I, 2, 16. iter illi in Lemnum ut esset, nostro in Otliciam.

Reliquas iam praepositiones eo, quae sunt earum litterae initiales, ordine recensere placet.

Asin. IV, 1, 39. nam tu poeta es prorsus ad eam renu-
nicus. V, 2, 70. quid huc receptio ad te estomenum vie-
rum? Bacch. II, 3, 62. reversionem ad terram faciunt
vesperis. Mil. Glor. III, 1, 15. sterilis hinc prospectus
usque ad ultimam plateam est probe. IV, 1, 16. tegone ut
ad te ab libertina esse auderem internantius? Trucul. II,
2, 3. quid tibi ad hasce accessio est aedis prope?

Adversus sine verbi copula in Pœnulo Plauti III, 1, 45.
ponitur. Item adversus populi sacpe leges. Sed alibi ita
usurpatur, ut in illis Taciti Ann. 15, 63. adversus praesentem
fortitudinem mollitus. Hist. 2, 12. Suedius Clemens am-
bitioso imperio regebat, ut adversus modestiam disci-
plinæ corruptus, ita proeliorum avidus. cf. Ann. I, 35.
47. Ita quidem dico, ut praepositio adversus cum casu suo quasi
sit adiectivum sive appositio totius enuntiationis. Plaut. Merc. III,
4, 10. quod nimis tardus est, adversum mei animi senten-
tiam. Terent. Phorm. III, 2, 35. ego te complures advor-
sum ingenium meum menses tuli. Hecyr. IV, 1, 19. potius,
quam adversum animi tui libidinem esset cum illo nupta.

Ante. Plaut. Asin. V, 2, 8. scito illum ante tuos
minimi mortalem preti. Terent. Andr. II, 2, 25. solitudo
ante ostium.

Apud. Plaut. Mil. Glor. II, 6, 26. inspectavisti meum apud me hospitem.

Inter. Plaut. Pseud. II, 2, 53. nam iste symbolum est inter herum meum et tuum. Mil. Glor. II, 1 61, qui amantibus una inter se facerem convenas.

Praeter. Plaut. Amphitr. II, 4, 65. Sosiam servum tuum praeter me alterum. Asin. V, 2, 6. et seclasta ego praeter alios meum virum fui rata siconam. Epid. V, 1, 4. si undecim deos praeter sese secum adducat Jupiter.

Pro. Plaut. Asin. II, 2, 23. pro monstro exemplum est. Capt. V, 1, 19. pignus pro me. Epid. II, 2, 102. opus est homine, qui illo argentum deferat pro fidicina.

Aliae praeter has non sunt a me repertae apud Comicos praepositiones aptae ex nominibus nullo verbi adminiculo. Atqui manifestum est, quam modica haec ratio sit in sermone et antiquo et populari, si contuleris vel ad Livii licentiam vel Taciti improbitatem. Quam quidem rationem, quod visu tactave contineatur, ita ut plerumque significetur, ubi quid sit, Teipelius arbitratur magis esse in consuetudine vulgi, quam philosophorum et elegantiorum hominum. Quod mihi quidem perillustratis iis scriptoribus, quibus aetates linguae latinae censentur, longe secus videtur esse. Nam lingua quaelibet, quo magis usu ac literis excolitur et perficitur, eo

magis quasi ad aliquod fastigiū et consummationem tendit*) ad nomen substantivum, ita ut id, quod prius non nisi per verbum atque enuntiationem dicebatur, paullatim unius substantivi nominis vi et notione finiatur et concludatur. Si contuleris Lutheri sermonem cum usu summorum nostrae aetatis scriptorum, admodum rarum invenies illum duorum nominum per praepositionem nexum. Inde illud est, quod in Ciceronis de philosophia libris atque apud iureconsultos videmus tam frequentem definiendi formulam confectam per ea nomina verbalia, quae in terminationem *-io* vel *-us* quartae declinationis exeunt. Tacitus autem totus est in substantivo nomine, ideoque etiam pro adiectivo saepissime habet adverbium nomini appositum,**) qualia plurima collegit Roth. ad Agric. Exc. XXIV. Quin etiam is, ubi per verbum rem enuntiat, id saepe ita facit, ut toti verborum complexui adiciatur nomen aliquod per appositionem, quam vocamus. Ann. I, 30. quosdam ipsi manipuli,

*) Bernhardsi Anfangsgründe der Sprachwissenschaft, pag. 29. „Das Substantiv überhaupt ist das letzte Ziel der christlichen Sprache und der ganze Satz ist das Streben und die Erreichung dieses Strebens.“

**) Neque hic adverbii usus admodum frequens est apud Comicos, si quidem discesseris a nominibus verbalibus in *-io* et *-us*. Maxima ex parte sunt adverbia temporis, quem ad modum apud Virgilium „signari ante matutina“ et apud Ovidium „spesere ante tot modo millibus. Apud Terentium illud est pueri notum „heri semper lenitas. In Plauti comediis haec invenies Persa III, 4, 16. populi saepe leges. IV, 2, 40. manifesto moechi, Persa III, 1, 51. nunc hominum mores.

documentum fidei, tradidere.*) Roth. ad Agric. Exc. VIII. Saepe enuntiatio tota, quae pro uno nomine est, aptam ex se habet praepositionem. Hist. 2, 86. is legibus nocens et tempore Neronis falsi damnatus, inter alia belli mala, senatorium ordinem reciperauerat. Hoc similiter fit atque supra demonstratum est in praepositione aduersus.

Ceterum ut recte dicas an secus, id nihil interesse arbitror, utrum praepositionis vis tota corporis contineatur sensibus, an in mente res sit posita et translatione. Mens enim plena et perfecta libertate agere existimanda est, atque in hac quoque re valet illud Quintiliani: iam paene quidquid loquimur figura est. Quod autem ad hunc usque diem liquere sibi negant artis grammaticae scriptores de modo ac terminis, intra quos cohibendi sint, quicunque nostra aetate antiquam latinitatem exprimere scribendo student, ne nostrarum linguarum usu abrepti temere omnes omnibus nominibus praepositiones subiiciant neglecta verbi copula, in quo vim et animam, sicut in nomine materiem et tanquam corpus orationis inesse dicit Quintilianns: ne ego quidem id curo, neque a quoquam ad certam et immotam regulam demonstratum iri exspecto, nisi quod usus et exemplum potior apud me est, quam ars et ratio, si qua tamen esse potest. Notatum est, quid Caesar, quid Cicero et Livius, quid

*) Non abhorret ab hoc loquendi usu Livius, apud Ciceronem nihil eiusmodi.

denique Tacitus sibi indulserint, nec non multa reperiuntur in dictione jurisconsultorum antiquorum et probatorum, qui in Corpus recepti sunt. *) Imitatio presso vestigio sequatur antiquos auctores, neve hos terminos temere ac sine exemplo excedat. Nolim sic dici, ut Horatius: mitte civiles super urbe curas, vel sic ut Virgilius: sub pedibus Styx atra, neque illud Ovidii non nimis ex poetica est licentia: pugnabant — mollia cum duris, sine pondere habentia pondus, ad quam licentiam prope sane accedit hoc Taciti Ann. XV, 68: sed ex conjuratis consilia cum Vestino non miscuerant. Sed illud clare apparet, inter praepositiones esse quasdam, quae cum casu suo ubique haud dubie possint pro adjectivo poni, ut: a, de, cum, sine, ex. **) Tum illud maximi est momenti, quod nomina in antiquis linguis pleraque non aequae atque in nostris substantiva vi plena praedita sunt, sed ut recte intelligantur fere verbi adminiculo iuvantur. Verbum enim tam Graecis quam Latinis praecipua pars orationis. Ne illa quidem ratio, quam scite satis graeco vocabulo prosopopoeiam appellari licet, castae sanaeque latinitati admodum usitata. Plurima, quae nos nomine includimus, si latine dicas, verbo eloqui necesse erit. Quod

*) Talia dico, qualia sunt: iudicium in octuplum, vindictae secundum libertatem, restitutio in integrum, heres ex asse.

**) Insolentius illud apud Terentium Ad. IV, 2, 45. lectulos in sole.

quidem manifestam erit, si lexica germanico-latina vel optima perolveris. Nam eorum scriptores dum omnia, quotquot sunt germanicae linguae nomina totidem latinis nominibus referre conantur, stultissime facere videntur, et tironem, qui his auxiliis ad scribendum latine uti voluerit, in turpissimos inducunt errores. Alia enim aliarum linguarum ratio est, et longe diversa antiquis cum nostris, quae hodie vigent. In compositis quidem vocabulis saepissime peccatur, quando duae pluresve partes per praepositionem in unam notionem conflantur. Id quod, sicut in principio diximus, primum videtur mentes grammaticorum hominum impulsisse, ut diligentius animum adverterent ad diversam novorum populorum et antiquorum rationem, qua illi per praepositionem et nomen, hi casibus declinationis et verborum mobilitate notiones animo conceptas inter sese copulare solent. Olim in censura lexici Kraftiani*) vir doctus vituperavit inter alia haec pro germanicis: *Erbsverbrüderung*, *Erbschaftsvergleich*, *Kellergewölbe*, *Erdenleben*, *Stegreifsvort* reddita latine sic: pactum ob mutuam successionem, transactio super hereditate, fornix in aedium fundamentis, vita hac in terra, versus ex tempore. Quae non nego sic nude posita satis horridiuscula neque ex antiqua latinitate esse videri, et nimia est cura omnia talia in lexica velle recipere, nam plurima per verbum erunt circumloquenda. Repndiabit,

*) Jen. Lit. Zeit. 1825. Dec. M 230.

credo, illa: pactum ob mutuam successionem, versum ex tempore, quisquis vel mediocrem latinae elegantiae usum habet: sed non ego discedere arbitror a vera latinitate, si quis dicat vicinum suum conqueri de labefactatis fornicibus in aedium fundamentis, aut: vitam in terra Apollini pro poena fuisse impositam. Krebsius quoque in Antibarbaro ita existimavit, non quidem quidquid similiter latinis scriptoribus nostra aetate dicatur, barbarum esse, sed esse rem multi iudicii magnaeque cautionis ad imitandum. Dubitari debet, inquit, num recte dicatur Roma ad Tiberim, Milonis domus in Germalò, urbes ad mare, hortus ante urbem. Ciceronis quidem esse Domitium praetorem in Sicilia (Act. in Verr. II, 5, 3), sed non imitandum, ut dicas regem in Macedonia, vel in Ponto. De quibus omnibus equidem non ante statuerim, quam universum videro complexum orationis. Praetorem in Sicilia a Cicerone scriptum esse, qui nihil non considerate, non eadem sententia crediderim, quasi praetorem Siciliae dixisset. Vitiosum est, rex in Macedonia pro rege Macedoniae, red recte dixeris regem in Asia vel in Graecia.

Absolvi id, quod institueram quaerere, utrum ille praepositionis usus, ut inter bina ponatur nomina, aequè late regnet in antiquiore lingua latina eademque populari a cultuque philosophico remota, an potius deinceps paulatim attollente se copia et cruditionis elegantia auctus sit et increbuerit. Id quod saepe facillimum erit intellectu, si

contuleris Taciti cum Plauti ac Terentii dictione. Non eo inficias hunc locum satis longe patere in grammatica arte, si penitus perscrutere; et esse omnino philosophiae capacem, quae cuiusvis rei docendae ac declarandae est magistra atque artifex. Nam et apud antiquos in eo genere Stoicorum secta multum elaboravit, et inter nos a Kantio profecti sunt, qui non cogitandi solum, sed etiam dicendi praecepta et leges ad ipsius doctrinam constituerent. Nobis autem scholasticis hominibus venia tribuenda erit, sicubi ex infinitate literarum circa unam alteramve particulam adhaeserimus et immoremur interdum ultra, quam necesse erat, quaestiunculis saepius atque ab aliis agitatibus. Ipsae etiam anniversariae hae scripturae culae modulo suo nobis imperant et est ubi coërceant. Verumtamen sicut in congressu hominum literatorum, ubi vaga per alia aliaque ex studiis argumenta disputatio modo, huc modo illuc libero fluxu fertur et impellitur, dum alius aliud promit in medium, quod ad rem perspicuam et illustrandam pertineat: sic non poenitebit his chartulis, quae longe lateque sparguntur, admonitum esse unum alterumve de re, quam forte non vacaverit ipsi quidem, in aliis fortasse argumentis occupato, investigare et cogitando explorare —